

# ERINDISBRÉF

## fyrir veituráð Húnaþing vestra.

### 1.gr.

#### *Stjórnskipuleg staða.*

Veituráð heyrir undir sveitarstjórn Húnaþings vestra. Veituráð starfar á umhverfissviði. Sveitarstjóri og veitustjóri starfa með ráðinu.

### 2.gr.

#### *Skipan ráðsins.*

Í veituráði eiga sæti 3 fulltrúar sem sveitarstjórn kýs til fjögurra ára að afloknum sveitarstjórnarkosningum samkvæmt ákvæðum sveitarstjórnarlaga og samþykktar um stjórn Húnaþings vestra. Á sama hátt eru kjörnir 3 fulltrúar til vara.

Auk kjörinna fulltrúa sveitarstjórnar eiga veitustjóri og sveitarstjóri eða staðgengill hans rétt á að sitja fundi ráðsins með málfrelsi og tillögurétt. Ráðinu er auk þess heimilt að kalla til sín sérhvern þann sem tengist málum sem fjallað er um.

Veituráð kýs formann og varaformann ráðsins á fyrsta fundi sínum nema sveitarstjórn ákveði annað. Sveitarstjóri eða fulltrúi hans ritar fundargerðir ráðsins.

### 3.gr.

#### *Hlutverk*

Veituráð fer með málefni vatnsveitu, fráveitu, hitaveitu og gagnaveitu, í samræmi við lög um vatnsveitur sveitarfélaga nr. 32/2004 með síðari breytingum, reglugerð um vatnsveitur sveitarfélaga nr. 401/2005 með síðari breytingum, hitaveitu í samræmi við orkulög nr. 58/1967 með síðari breytingum, lög um uppbyggingu og rekstur fráveitna nr. 9/2009 með síðari breytingum. Auk verkefna sem veituráð hefur með höndum samkvæmt lögum og samþykkt þessari, getur sveitarstjórn falið henni ýmis önnur verkefni.

Hlutverk veituráðs er eftirfarandi:

- Að vera sveitarstjórn til ráðgjafar í málefnum veitna.
- Að gera tillögur til sveitarstjórnar varðandi rekstur og framkvæmdir veitna
- Að hafa eftirlit með framkvæmdum, verklega og kostnaðarlega.
- Að hafa eftirlit með því að unnið sé á sviði ráðsins í samræmi við þau lög og reglugerðir sem um starfsemina gilda.
- Að hafa eftirlit með því að samþykkt markmið sveitarstjórnar í málefnum veitna nái fram að ganga.
- Að fjalla um drög að fjárhagsáætlun viðkomandi málaflokka.

#### **4.gr.**

##### *Starfshættir*

Í störfum sínum skal veituráð taka mið af þeim lögum og reglugerðum sem undir starfsvið þess heyra. Þá skal ráðið fylgja samþykkt um stjórn Húnaþings vestra eftir því sem við á eins og hún er hverju sinni.

Veituráð kemur saman fyrir luktum dyrum á fastákveðnum fundartíma að jafnaði einu sinni í mánuði. Skal ráðið gera samþykkt um þennan fundartíma á fyrsta fundi sínum að höfðu samráði við sveitarstjóra.

Sveitarstjóri sér um að boða ráðið til fundar í samráði við formann ráðsins og sjá þeir sameiginlega um undirbúning funda ráðsins. Fundarboðun skal vera skrifleg og tilgreina fundarstað, dagskrá og tíma. Fundarboð skal sent fulltrúum í ráðinu og öðrum sem seturétt hafa á fundum eigi síðar en tveimur sólahringum fyrir fund.

Formaður veituráðs stýrir fundum ráðsins í samræmi við ákvæði samþykktar um stjórn Húnaþings vestra.

Fundur telst ályktunarhæfur ef meirihluti ráðsins er mættur á fund. Í atkvæðagreiðslum ræður afl atkvæða. Mál telst fallið í atkvæðagreiðslu ef atkvæði falla að jöfnu með og á móti.

Fundargerð skal skrá í gerðabók og í tölvu. Í gerðabók skal skrá hvar og hvenær fundur er haldinn, hverjir sitja hann og hvenær honum lýkur. Í fundargerð í tölvu skal skrá einstök mál, sem tekin eru fyrir á fundinum, hvenær þau komu til, nöfn hlutaðeigandi, meginefni og afgreiðslu ráðsins. Í lok fundar skal ritari lesa fundargerðina upp og allir viðstaddir undirrita hana. Sveitarstjóri sér um að fundargerðin verði lögð fram með dagskrá næsta sveitarstjórnarfundar.

Sveitarstjóri kynnir fundarmönnum afgreiðslu sveitarstjórnar á fundargerðum veituráðs.

#### **5.gr.**

##### *Eftirfylgni*

Formaður veituráðs og aðrir fulltrúar í ráðinu skulu snúa sér til sveitarstjóra með eftirfylgni staðfestra samþykktá ráðsins.

#### **6.gr.**

##### *Réttindi og skyldur*

Um réttindi og skyldur fulltrúa í veituráði gilda ákvæði sveitarstjórnarlaga og samþykktar um stjórn Húnaþings vestra.

Fulltrúa í veituráði er skylt að sækja fund nema lögmæt forföll hamli. Skal hann boða varamann sinn og láta formann ráðsins eða sveitarstjóra vita um forföll með góðum fyrirvara.

Hver fulltrúi í ráðinu á rétt á að koma máli á dagskrá fundar, enda skili hann upplýsingum um efni þess til sveitarstjóra a.m.k. þremur sólahringum fyrir fund.

Fulltrúar í ráðinu skulu hafa hag sveitarfélagsins að leiðarljósi við störf sín en eru ekki bundnir af öðru en sannfæringu sinni, lögum og samþykktum um stjórn Húnaþings vestra í atkvæðagreiðslu um málefni í veituráði.

Fulltrúar í ráðinu eru bundnir þagnarskyldu vegna mála sem þeir fá vitneskju um í starfi sínu fyrir ráðið og eiga að fara leynt samkvæmt lögum, eðli máls eða samþykktum 2/3 hluta fulltrúa í ráðinu, hvort sem þau varða einka- eða almannahagsmuni. Þagnarskylda helst óbreytt þótt menn hætti setu í ráðinu eða láti af störfum á þess vegum.

Gæta skal sérstaklega að því að unnið sé í samræmi við lög um persónuvernd og vinnslu persónuupplýsinga nr. 90/2018.

Fulltrúar í ráðinu skulu kynna sér vandlega lagareglur um hæfi til afgreiðslu einstakra mála. Fulltrúi í ráðinu sem veit hæfi sitt orka tvímælis ber að vekja athygli á því og ef við á víkja af fundi við umræðu og afgreiðslu máls.

Samþykkt af sveitarstjórn Húnaþings vestra 11. júní 2019